

■ OR DA LA VITA DA LUDMILLA CAHENZLI

Ina chautscha da sport per Eugen Cahenzli

Eugen dovra ina chautscha da sport. Già dapi trais onns di el quai. E già dapi trais onns n'è el mai vegnì sper ina fatschenta da sport ora e n'ha mai gè pèda dad ir a cumprar ina tala chautscha. Jau, Ludmilla Cahenzli, la consorta dad Eugen Cahenzli, ma chat gist davant ina gronda fatschenta da sport. Jau ma di: Atgnamain pudessas ti cumprar ina chautscha per tes Eugen, uschiglio vai anc ina giada trais onns e tes pauper um na po mai far sport, perquai ch'el n'ha betg ina chautscha adattada. Forsa mora el anc in di pervi d'ina attatga dal cor, perquai ch'el è adina en biro e n'ha nagin moviment. E sch'el mora, na dovra Eugen nagina chautscha da sport pli.

Jau entr en la fatschenta che ha la surfatscha da la planira da la Greina (Tgi che vul, po era s'imaginar il parc naziunal). Entaifer relativ curt temp chat jau ina partiziun cun vestgadira da fitness. Quai è segir ideal per Eugen che vul far trenament da forza. Jau tschertg insatge che plaschess a mes um. Rosa n'è betg ideal. Mellen era betg. En stgirblau u nair na chat jau nagut. Tut è memia pitschen. Suentar avair tschertgà ina mes'ura decid jau da dumandar in da quests vendiders che sajettan trasor sperasvi. L'emprim ch'jau dumond fa sco sch'el n'udiss nagut. Il segund ed il terz empermettan da turnar. Tar il quart dun jau in sbratg. I gida. El ma mussa ses bellezza surrir da vendider da sport, uschia ch'jau, Ludmilla Cahenzli, ma calm immediat.

Jau al declar la situaziun. Jau stend la bratscha per mussar las proporziuns dal venter da mes um.

«Tge grondezza ha lura Voss um?», ma dumonda il vendider.

Be da bass scutin jau la cifra.

«Qua na chattais vus nagut per Voss um...»

Igl è pia memia tard, pens jau. I na dat nagina chautscha e nagina speranza pli per Eugen. El vegn a viver per il rest da la vita cun sia panzuna. Ed jau era.

«... ma en la partiziun da trenament da forza datti segir insatge», cuntinue-scha il vendider.

Jau suond il vendider e sun uschè happy ch'jau emblid schizunt da dumandar



ILLUSTRATURA
YVONNE GIENAL
WWW.YVONNE-GIENAL.CH

tge ch'è insumma la differenza tranter fitness e trenament da forza. 100 meters plinenvi s'extenda la partiziun da trenament da forza. Il vendider sfugata ditg tranter las stangas e tira finalmain nana-vant ina chautscha flurida. «Quai è la suletta ch'i dat en la grondezza da Voss um.»

Trista scurlat jau il chau. Pli gugent mora mes Eugen che da trenar en ina tala chautscha.

Il vendider vesa ch'jau cumenz prest a bragir. El fa svelt la proposta: «En il mender cas pudess ins tschertgar en la partiziun da ballape. I dat blera glied che fa trenament da forza cun vestgadira da ballape.»

«Pertge?», dumond jau. «Datti pia ina differenza tranter chautschas per trenament da forza e chautschas da ballape?» Jau sent immediat ch'jau hai commess in fauxpas fatal. Il vendider ma guarda sco sch'jau al avess dà ina enturn las ureglias. Cardinal Joseph Ratzinger guardass circa tuttina tup, sch'jau al dumandass, sch'i dettia ina differenza tranter Dieu ed Allah. Pli gugent avess jau duvrà il Papa sco exempel. Ma lez guarda ils ultims onns permanentamain curius.

Jau, Ludmilla Cahenzli, sai che la differenza tranter ina chautscha da fitness ed ina chautscha da ballape è inexistenta,

u almain irrelevanta, exact sco la differenza tranter Dieu ed Allah. Ma i dat situaziuns en la vita, nua ch'ins sto salvar tschertas sabientschas per sai, per exempel sch'ins discorra cun in vendider da sport u cun cardinals. Cun tals tips èsi simplamain d'esser precaut.

En il fratemp percurrin nus – jau ed il vendider – la catedrala da la vestgadira da sport. Nus chaminain tras las partiziuns dad outdoor, da raiver, da tennis e da sport dad aua. Finalmain essan nus tar las chaussas da ballape.

Nus chattain ina bella chautscha «da ballape» per Eugen. Il vendider è levgià che la clienta – che sbragia e sponda larmas – è satisfatga. Nus dain adia in a l'auter ed avain compassiun in cun l'auter. El cun mai, perquai ch'jau hai in um gross. Jau cun el, perquai ch'el lavura en ina fatschenta da sport.

PS: La chautscha ha per cas plaschì ad Eugen. In'emna pli tard ha el cumenzà a trenar. Trais mais pli tard hai jau già stuì cumprar ina chautscha pli pitschna – grondezza 56.

Il cudesch pon ins retrair online tar Lia Rumantscha www.liarumantscha.ch (http://www.liarumantscha.ch/sites/content/online_shop.html?shop:view=details&shop:productid=2830) u tar mintga libreria